



GIYA SA PAGPANANUM UG SAGING



TABLE OF CONTENTS



1	PAGPILI SA YUTANG PAGATAMNAN
1	PAGPREPARAR SA YUTANG PAGATAMNAN
1	ANG AMPUNGOL
1	ANG PAGTANUM
2	ANG PAGPREPARAR SA MGA SAHA O PLANTING MATERIALS
2	ANG PAG-ATIMAN O PAGDUMALA
3	ANG PAGTUBA
4	MGA BULUHATON HUMAN SA PAGTUBA
4	BUGTOK
6	MOKO DISEASE
7	BANANA MOSAIC
8	BRACT MOSAIC
9	BLACK SIGATOKA
11	YELLOW SIGATOKA
13	BANANA BUNCHY TOP
15	PANAMA DISEASE

PAGPILI SA YUTANG PAGATAMNAN

1. Ang saging mas maayo itanum sa yuta nga pugday, adunay taas nga nutrisyun ug adunay kapasidad nga mupabilin ug tubig ug hangin alang sa maayo nga pag gawas sa gamot.
2. Kaaslumon sa yuta nga 4.5 hangtod 7.5 (pH).
3. Temperatura nga 15°C hangtod 35°C.
4. Mas maayo kung adunay patubig o duol sa tinubdan sa tubig, likaye ang pagtanum sa lugar nga bagyuhunon ug adunay kanhing kasinatian sa mga sakit sa saging.

PAGPREPARAR SA YUTANG PAGATAMNAN

1. Hawanan o limpyohan pag-ayo ang lunang pagatamnan.
2. Daruhon pag-ayo ug karason ang luna 2-3 ka higayon sa lugar nga patag apan kung ang lugar bakilid girekomenda ang dimano nga pagbungkal aron malikayan ang pagkabanlas sa yuta.
3. Mag-kabot ug mga 50 sentimetro (cm) ang dayametro (dm) ug 30cm ang kaladmon ug magbaton sa insaktong distansya matag tudling. Alang sa saging sab-a, kinahanglan adunay 5 ka metros (m) ang distansya matag tudling ug alang sa latundan ug lakatan, 3m ang distansya matag tudling.

ANG AMPUNGOL (CORM)

1. Mokuha kita ug mga ampungol (corms) gikan sa mga himsog ug walay sakit nga mga saha ug kadtong wala pa maka-agi ug pamunga.
2. Mogamit lang ug ampungol nga adunay 10-15cm ang dayametro gikan sa pinutlan ug nagabaton ug dili mokubos usa (1) ka maayong pyu-os.

ANG PAGTANUM

Girekomenda nga magtanum sa pagsugod sa tag ulan aron masiguro nga anaay tubig samtang bag-o pa gatubo ang saging ilabi na sa lugar nga walay tubdanan sa patubig.

1. Itanum ang tibuok ampungol o mahimong itanum usab ang mga pinutlan niini nga adunay buhing pyu-os.

2. Itanum ang saha o ampungol diha sa bangag nga adunay 30cm ang giladmon. Hinayon pagtabon sa yuta ang punuan.
3. Distansya sa pagtanum:
 - a. Saba / Cardava (5m x 5m)
 - b. Latundan / Lakatan (3m x 3m)

ANG PAGPREPARAR SA MGA SAHA O PLANTING MATERIALS (Sword or Maiden Leaf)

1. Ang mga saha o suckers kinahanglan adunay katas-on nga 0.5m hangtud 0.75m. Tangtangan ang mga dahon ug ibilin lang ang duha ka pinakalinghod nga mga dahon.
2. Alang sa mga dumalagahay nga mga saha o *maiden leaf suckers*, putlon kini sa gitas-on nga 10cm gikan sa punoan.

ANG PAG-ATIMAN UG PAGDUMALA

1. Pag-abono
 - a. Mas maayo nga magpahigayon kita ug pag-analisar sa yuta kon *soil analysis*. Mahimo usab kita mogamit ug organikong abono sama sa *bio compost* ug uban pa.
 - b. Ibutang ang abono 30-60cm palibot gikan sa punuan sa tanum.
 - c. Sa mga bakilid nga lugar, ang abono kinahanglan i-plastar pag-ayo aron kini dili mabanlas.
2. Manghingunas kausa sa matag tulo ka bulan gamit ang sanggot o sundang-hait nga gihigot sa kawayan aron malikayan ang pagdaghan sa peste ug sakit, makatuhop ang init sa adlaw ug mas paspas ang pagdaku sa saha.
3. Kuhaun ang saha nga wala na kinahanglana pinaagi sa paglukat niini gamit ang pala o sundang. Magbilin lamang ug isa o duha ka himsog nga saha aron malikayan ang kompetisyon sa nutrisyun.
4. Aron mapanalipdan batok sa bugtok, sundon ang mga pamaagi nga girekomenda alang sa pagsumpo niini, sama sa mosunod:
 - Pagputos sa bunga ginamit ang sako o plastic bag.
 - Manghimuso dayon human mopatin-aw ang katapusang sipi.
5. Tukoran (*propping*) ang mga punoan hilabi na ang adunay dagko nga bulig aron malikayan ang pagkatumba niini sa panahon nga hanginon o dugay ang ulan.

ANG PAGTUBA

Mga ilhanan nga angayan nang tubaon ang saging:

1. Ang tanum adunay pinakamenuus 6 ka buok na lamang nga dahon ug kini yellow o dalag ang kolor.
2. Himsog, lunhaw o *green* ug gulang na ang mga dawin/ bunga.

PANAHAON SA PAGTUBA

Klase sa Saging	Petsa sa Pagtuba (Semana gikan sa pagpamuso)	Mga Adlaw Gikan Mitumaw ang Katapusang Sipi
1. Latundan	9-11	Tubaon dili momenus 80 ka adlaw
2. Lakatan	12-14	Tubaon dili momenus 80 ka adlaw
3. Saba/ Cardava	20-24	Tubaon dili momenus 118 ka adlaw

ALANG SA MGA GAGMAY NGA SIPI

1. Putlon paghinay ang punoan sa gitag-on nga $\frac{1}{3}$ gikan sa ibabaw nga parte sa saging;
2. Mogamit ug sundang o hatsa ba hinoon alang sa pagtuba;
3. Hawiran ang pungango sa saging ug magbilin ug mga 30cm aron himoong hawiranan.

ALANG SA MGA DAGKONG BULIG

1. Mogamit ug kawayan isip tukod aron mo-suporta sa dagkong bulig;
2. Hinayon pagtuba ang saging pinaagi sa pagtulod sa tukod sa kawayan hangtud nga ang saging maabot na sa pagputol;
3. Putlon ang bulig 46cm ibabaw sa iyang pungango aron adunay hawiranan;
4. Putlon dayon ang lawas sa saging apan dili lamang kini mub-on pagputol. Magbilin ug 1-1.5m nga katas-on.

MGA BULUHATON HUMAN SA PAGTUBA

- 1.) Gamiton ang limpiyong sundang o kutsilyo o *special dehanding knife*;
- 2.) Lainon ang mga dawin base sa gidak-on niini. (*Sorting/Grading*)

Klase sa Saging	Dagko (cm)	Average (cm)	Gagmay (cm)
1. Latundan	13	8-13	6-8
3. Saba/Cardava	12	10-12	8-10
3. Lakatan	15	10-15	10

3. Ang Packaging : (*Mga materyales nga angayan gamiton sa packaging*)

1. Rattan baskets ug bukag nga gikan sa kawayan nga hinanigan ug dahon sa saging, o papel;
2. Mga kahon o wooden crates nga adunay 12-15 ka kilo (kg) ang kapasidad.
3. Mga karton nga adunay 12kg ang kapasidad.

ALANG SA MGA DAGKONG BULIG

Kasagaran ang mga sipi tipigan sa mga bugnaw nga tipiganan o cold storage ug mga lugar usab sa pagpahinog o *ripening rooms*:

Klase sa Saging	Pinakataas nga Temperatura sa Pagtipig (°C)	Mga Kasagarang Adlaw sa Pagtipig (Storage Period)
1. Saba/Cardava	10	35
2. Latundan	14	21-28
3. Lakatan	13	28

MGA KASAGARANG SAKIT SA SAGING

BUGTOK

Ang Sab-a, Kardaba ug usahay ang Latundan mao ang kasagarang klase sa saging nga masakit ug “bugtok” o “tibagnol”. Ang maong termino nagahulagway sa paglubad o pagka-usab sa kasagarang kolor sa bunga, ug ang pagkagahi

niini bisan ug hinog na. Kini tungod sa pagtakboy sa usa ka *bacteria* nga gitawag ug "*Pseudomonas solanacearum*".

PAGKUYANAP

Ang pagkuyanap sa maong sakit gituohan nga dala sa hangin o *airborne disease* pinaagi sa mga insekto sama sa buyog, lapinig, *thrips* ug uban pa nga mosiba sa bulak sa saging. Ang saging nga adunay sakit nga bugtok dili pagasabton nga ang iyang mahimong mga saha aduna usab niini.



MGA TIMA-ILHAN

- Sa sulod sa pungango ug sa dawin, o kun grabe na sa subok, makita ang baglit o *brown vascular streak*.
- Walay mamatikdan nga pagkalaya o pag kamatay sa tanom ug ang iyang bunga mobantok o gahi bisan kini hinog na.
- Ang pal-ak sa puso dili mataktak o matagak bisan ug kini uga na.

UNSAON PAGSUMPO

- Makanunayong paghinlo sa punoan ug sa palibot niini ug ang panghingunas o *deleafing*.
- Sayo nga panghimoso o *debudding*. Kini pagahimoon kon ang *false hand* o mga piyasot nga sipi mopakita na.
- Putuson ang puso sa saging sa panahon nga moduko na kini. Mahimong gamiton ang plastic bag o sako nga buslot ang tumoy. Tangtangan ang sako o plastic bag sa higayon nga pwede na himosoan ang saging, mga 14 ka adlaw gikan pagputos.
- Ang pagputos mao ang usa sa nakitang pinaka-epektibo nga pamaagi sa pagkontrolar sa bugtok basi sa mga resulta sa pag panuki-duki sa Department of Agriculture.
- Seguraduhon nga ang yuta nagbaton ug insaktong nutrihina o abuno. Ang tabunok nga yuta makatabang sa tanum aron kini himsog ug dili dali mataptan sa sakit.

MOKO DISEASE

PASIUNA

Ang *Moko Disease* o *Bacterial Wilt*, usa ka mananakod nga sakit diin ang saging nga aduna niini, mahimong mamatay sulod sa pipila lamang ka semana. Ang hinungdan niining maong sakit nagagikan sa kagaw nga anaa sa yuta. Kining maong sakit kasagaran mu-atake sa saging nga Latundan, Lakatan, Morado, Señorita, Cavendish, Saba o Cardaba.



PAGKUYANAP

Ang maong sakit mahimong mutakod pinaagi sa paggamit sa mga himan sa uma (*tools*) nga nataptan ug kagaw tungod sa paggamit niini didto sa adunay sakit nga tanom ug sa mga insekto nga gatabok-tabok sa lain-lain mga tanom. Ang pagsulod sa kagaw gikan sa yuta ngadto sa gamut sa tanom hinay apan tungod sa tubig, ang pagkaylap sa kagaw sa ubos nga mga lugar, mamahimong madali. Ang mga timailhan sa impeksyon mamatikdan sa sulod sa napulo ka adlaw o labaw pa human makasulod ang kagaw ngadto sa tanom.

TIMAILHAN

- A. Ang ikaduha ngadto sa ikaupat nga pinakabata nga dahon sa saging mahimong mulubad ang kolor o dili ba kaha mahimong dalag (*yellowish*) ug unya masiak sa tunga sa pungango kauban sa palid sa dahon o lawas niini.
- B. Adunay medyo abohon (*gray*) o kaha tabonon nga agi sa kagaw diha sa taas nga pinutlan sa punuan o ampongol (*corm*) sa tanom.
- C. Pagpangitom sa unod sa saging.
- D. Wala naporma nga mga lusok/dawin sa saging ug sayo nga pagpangdalag sa maong lusok/dawin.
- E. Ang mga pinutol nga lusok/dawin magpakita'g uga ug pagkadugta nga adunay tabonon o itom nga kolor.

PAMAAGI SA PAGPAKGANG/PAGSUMPO

- A. Sayo nga pagdiskubre sa tanom nga adunay sakit pinaagi sa pagputol ug paglukat sa punoan ug ampongol niini.
- B. Bubuan/sprayhan ang mga nabilin nga parte sa tanom ug kemikal (*herbicides*). Dayon, ibton ang uban pang tanom nga saging nga apektado sa maong sakit nga anaa sa palibot niini.
- C. Sunugon ang mga naputol nga parte sa saging gamit ang *rice hull*.
- D. Papahulaya ug usa ka tuig ang yuta nga gikuhaan sa tanom nga adunay sakit.
- E. I-sterilize ang mga himan sa 10% formaldehyde solutions sulod sa usa ka minuto una gamiton.
- F. Ayohon ang agianan/awasanan o *drainage* sa tubig sa maong lugar.
- G. Siguraduhon nga ang yuta nagbaton ug insaktong nutrihina o abono.

BANANA MOSAIC

PASIUNA

Ang *banana mosaic* gitawag usab nga *infectious chlorosis* o *heart rot*. Nagagumikan kini sa *cucumber mosaic virus* (CMV) nga nakaapekto sa tibuok palibot. Ang mga tanum sama sa pipino, talong, mais, maoy puyanan usab niini nga bayrus. Ang tanang klase sa saging pwedeng taptan niini nga sakit.



Sa paglabay sa mga adlaw, ang maong mga tuldok magsumpay-sumpay ug makahimo sa dahon nga maughan ug malaya.

Ang maong mga badlis nga putol-putol, pata-as ug pa-ubos mahimong hinungdan nga maughan ug malaya ang mga dahon. Mahimong abnormal o dili kasagaran ang mga porma sa dahon sa saging nga bag-ong gawas ug dili na pareho

ang pagtubo niini, daw nagbalod balod o kurba kurba ang mga kilid sa dahon sa saging.

Talagsaon ra nga tubuan ug normal nga dahon ang saging nga adunay *banana mosaic*. Kung duna man, kini malawos dayon adunay mamahimo sa gitawag nga *heart rot*. Ang *heart rot* mao ang lahos na nga pagkadaot sa mao pa lamang nga nagtubong dahon sa saging nga mo resulta dayon sa pagkadaot sa tibuok lawas niini.

ANG PAGTAKOD SA SAKIT

Ang hinungdan sa pagkaylap sa maong sakit nagagumikan sa *aphids*. Ang mga *aphids* gikan sa mga tanum sama sa pipino, mais ug apil na ang saging.

PAGSUMPO SA SAKIT

- A. Lukaton ang tanang saging nga aduna niini nga sakit.
- B. Tan-awon ug bantayan nga walay motubong sagbot sa sagingan ug ang pagkadaghan sa *aphids*.
- C. Motanum lamang ug mga saha nga walay sakit.
- D. Padayon nga pagsusi o inspeksyon sa mga tanum.
- E. Siguraduhon nga ang yuta nagbaton ug insaktong nutrihina o abuno.

BRACT MOSAIC

PASIUNA

Ang *Banana Bract Mosaic* usa ka sakit sa saging nga nagagumikan sa *virus* nga nadiskobrehan niadtong 1988. Kini gituohan nga pareho ra ang epekto sa *Banana Mosaic* ug napamatud-an nga daghan kining maong sakit sa mga saging nga sab-a o cardaba. Ang maong sakit mahimong makapakunhod sa abot sa maong mga klase sa saging og 30-40 porsyento.



MGA TIMAILHAN

Ang unang timailhan nga makita pagkahuman motakboy sa mga *aphids* ang virus mao ang mga kolor lunhaw (*green*) ug kape (*brown*) nga mga gagmayng badlis badlis. Makita kini nga magkatag na didto sa kilid sa dahon.

PAGTAKOD

Ang *Bract Mosaic* mahimong mokaylap pinaagi sa sa mga *aphids* nga nagdala ug virus gikan sa tanum nga mais ug doldol.

PAGSUMPO SA SAKIT

- A. Lukaton ang tanang punuan nga aduna niini nga sakit. Tadtaron ang tibuok lawas sa saging ug paughon kini.
- B. Likayan ang pagtanum ug pipino ug uban pang tanum nga kapamilya niini sa hinungdan nga kini pwedeng taptan sa mga *aphids* nga maoy nagdala sa virus.
- C. Motanum lamang ug mga saha nga luwas sa maong sakit.
- D. Kanunay nga manghinlo sa sagingan. Kinahanglan nga mintinahon ang kalimpyo sa palibot.
- E. Siguraduhon nga ang yuta nagbaton ug insaktong nutrihina o abuno.

BLACK SIGATOKA

PASIUNA

Ang *Black Sigatoka* o itom nga talumtom sa dahon sa saging unang nakita sa Fiji niadtong tuig 1963.

Ang hinungdan sa maong sakit mao ang agup-op nga may siyentipikong pangalan nga *Mycosphaerella fijienses* ug giila nga mas kuyaw nga sakit kaysa *Yellow Sigatoka*.



Kung ang duha ka sakit makita, ang *Black Sigatoka* ang mopatigbabaw. Ang sab-a o cardaba dili dali dutlan samtang ang lakatan, tundan, bungulan ug señorita dali takbuyan.

PAGTAKUD

Kung ang conidia mogula na, kini mokaylap ug motakboy pinaagi sa hangin. Unang takbuyan ang udlot ug unang dahon sa saging. Dali rang mokuyanap ang sakit ilabi na sa mga basa o umog nga palibot.

TIMAILHAN

- A. Sa sinugdan, makita ang gagmay ug dagtum nga badlis sa ilawom sa ikatulo ug ika-upat nga dahon.
- B. Human sa badlis nga hugna adunay mga talumtum motubo sama sa *Yellow Sigatoka*.
- C. Ang mga talumtum modako sama sa badlis nga may dagtum nga kolor ngadto sa pagka-abohon o itom.
- D. Ang mga itom nga badlis magdasok og mobaga ug kon kini mabasa sa tubig, ang mga dahon moitom, ug daling mamatay.

PAGSUMPO

- A. Hatagan ug igong kalay-on ang mga gitanum nga saging sumala sa gi-rekomenda nga distansya depende sa matang sa saging aron malikayan ang pagsapaw sa mga dahon, hinungdan sa paglandong nga pabor sa pagtakboy sa sakit.
- B. Mintenahon ang kalimpyo sa kasagingan.
- C. Kuha-a ang dunay sakit nga dahon aron dili mokuyanap pagdali ang sakit. Putlon ang tibook dahon kung may 75% na sa dahon ang naapektuhan, kung may 50% o dyutay pa niini, guntinga ang bahin sa dahon nga may sakit. Ayaw palabihi ang pagpamutol sa mga dahon.
- D. Magbaton ug awasanan o kanal aron malikayan ang pagpundo sa tubig nga maoy makatabang sa pagpatubo sa sakit.
- E. Mintinahon ang limitadong kadaghanon sa saha matag punoan.

- F. Mogamit lamang ug kemikal kung gikinahanglan. Alang sa gagmay nga mga mag-uuma, mogamit ug kemikal alang sa agup-up sa gidaghanon nga 100 litro nga tubig; *Daconil* 2 gramo/litrong tubig o *Beniate* 1-2 gramo/litro tubig sa sal-ang nga 14-21 ka adlaw. Kinahanglan ang tukma ug insakto nga pag-gamit sa kemikal aron malikayan ang pagkasunog/ pagkalawos sa mga dahon ug prutas.
- G. Seguraduhon nga ang yuta nagbaton ug insaktong nutrihina o abuno.

YELLOW SIGATOKA

PASIUNA

Ang sakit nga *Yellow Sigatoka* nagagikan sa usa ka klase sa agup-op nga gitawag ug *Mycosphaerella musicola* Leach ex. *Milder*. Dinhi gikan ang sama sa mga pulbos nga gitawag ug *conidia* ug *Ascospores* nga nagkatag sa tibuok lawas sa saging.



ANG TIMAILHAN

Ang unang timailhan sa sakit nga *Yellow Sigatoka* mao ang paggawas sa mga *yellow* ug *green* nga badlis-badlis diha sa ibabaw ug ubos sa ikatulo o ikaupat nga pinakalinghod nga dahon sa saging. Ang maong mga badlis-badlis modaghan ug molubad ngadto sa kolor kape.

Samtang modaghan ang maong timailhan, kini mahimong mokaylap pa ngadto sa ubang dahon ug mamahimong kolor kape ang mga *yellow green* nga parte sa dahon. Daling mag-itom dayon ang kolor sa taliwala niini hangtud nga malaya kini ug ma-ughan ang linghod pa unta nga mga dahon.

ANG PAGTAKOD SA SAKIT

Kung adunay sakit nga *Yellow Sigatoka* ang saging, mahimo nga ma-ughan ang mga dahon niini ug mahimong gagmay ang bulig o bunga. Ang Sab-a ug Cardaba dili dali mataptan sa maong sakit apan ang Latundan, Bungulan ug Señorita dali ra nga mataptan. Kung mokaylap na ang mga *conidia*, kini mouban sa agas sa ulan ngadto sa mga dahon ug uban pang parte sa lawas sa saging. Sa laing bahin, ang mga ascospores usab madala uban sa hangin.

Ang unang mataptan sa sakit nga *Yellow Sigatoka* mao ang mga linghod nga dahon sa saging o ang bag-o pa lamang buklad nga mga dahon niini.

PAGSUMPO SA SAKIT

- A. Ang kada klase sa saging adunay rekomendadong distansya sa pagtanum. Sundon kini aron malikayan ang panagdug-ulay sa mga dahon sa saging. Kini nga paagi malikayan ang pagkaylap sa sakit nga *Yellow Sigatoka*.
- B. Mintenahon ang kalimpyo sa kasagingan.
- C. Tangtanganon o kuhaon ang mga dahon nga nagapakita ug simtoma sa maong sakit. Aron dili mahurot ang dahon sa saging, tangtanganon lamang ang dahon kung 75% na ang naapektohan sa maong sakit. Kung 50% ang nakitang ka daut, tangtanganon lang ang daut nga parte sa dahon sa saging.
- D. Maghimo ug mga kanal nga maoy agi-anan sa tubig. Kung daghan ang tubig sa sagingan mahimong basa ang palibot niini ug maoy gusto nga puluy-anan sa mga agup-op.
- E. Seguraduhon nga ang yuta nagbaton ug insaktong nutrihina o abuno.
- F. Magbomba o mag-spray lang kung gikinahanglan. Mahimong gamiton ang *fungicide*. Nagakinahanglan ug 100 ka litro solusyon sa kada ektarya nga sagingan. Kung gamiton ang Dithane M-45, isagol ang 3-5 ka gramo sa kada litro nga tubig. Kung gamiton ang Daconil, 2 ka gramo sa kada litrong tubig. Kutawon pag ayo ang maong solusyon aron malikayan ang sobrang concentration sa kemikal nga posibleng mawisik didto sa mga dahon ug bunga.

BANANA BUNCHY TOP

PASIUNA

Ang *Banana Bunchy Top* (BBT) maoy usa ka *virus disease* nga makaapekto sa *Musa* family sama sa saging. Kini nga sakit namatikdan sa Fiji niadtong tuig 1889. Sa tuig 1890, ang Taiwan nagmantala sa maong pag-ataki ug mikaylap kini sa Egypt sa 1901. Niadtong 1913 ang timailhan niini namatikdan sa Australia. Sa Pilipinas usab namatikdan ang iyang unang pag-ataki sa mga abaca.



Ang hinungdan sa maong sakit mao ang *virus* nga gidala sa *brown banana aphid*, (*Pentalonia nigronervosa* Coq.) nga nagasuyop sa duga sa saging, abaca, gabi-gabi ug camia. Kini nga mga dangan makita sa palwa ug dahon sa maong mga tanum.

ANG PAGTAKUD SA SAKIT

Sa higayon nga ang brown banana aphid makasiba sa masakiton nga tanum, anaa na kaniya ang maong *virus*. Kini nga dangan ang modala sa maong *virus* ngadto sa uban pang mga tanum.

Ang tanang matang sa saging sama sa: Cavendish, Grand maine, Lakatan, Latundan, Bungulan, Saba, o Cardaba ug Señorita maoy madaling atakihon sa maong sakit.

TIMAILHAN

Ang maong virus mahimong moatake sa tanang pangidaron sa saging.

Ang sayo nga pag-ataki mamatikdan sama sa kolor green o lunhaw nga mga badlis-badlis sa dahon ug palwa nga maoy hinungdan sa medyo dili maayong pagbuklad niini. Ang

mga dahon mamahimong gagmay kay sa kasagarang gidak-on ug may pagka-lukot sa ibabaw niini. Mamahimong tuskig ang maong mga dahon ug dali ra mabali o magisi kon kini pagabawgon o kusuhon. Tungod kay dahon man ang nadaut, moresulta kini sa grabe nga pagkasawot. Ang saging nga giataki niini talagsa lang ang makahatag ug bunga. Kon kini makabunga, depormado ang mga sipi ug gagmay kaayo ang mga dawin.

UNSAON PAGSUMPO

- A. Mogamit ug mga *virus free* nga mga igtatanom ug mga saha nga gikan sa *tissue culture*.
- B. Ang dali nga paagi sa pagsumpo sa giataki nga tanum ginamit ang mga musunod:
1. Isprayhan sa tukma nga *insecticide* nga makapatay sa *aphids* ang tanang tanum apil ang yuta niini sulod sa 6 ka metros ang dayametro. Human sa biyente-kwatro (24) oras gikan pag-spray lukaton ang tanum ug tadtaron ug pino, ibulad hangtud nga mauga aron dili na kini motubo.
 2. Kung adunay nahibilin pang mga puno-an, putlon kini ug butangan ug herbicide + urea (46-0-0) ginamit ang lipak sa kawayan aron dili na kini makatubo pag-usab. Kun motubo man gani pagbalik, usbon ang maong paagi ngadto sa saha sa maong punuan.
 3. Makanunayon nga pag-spray ginamit ang mga rekomendado nga mga *insecticide* alang sa pagsumpo o pagpatay sa *aphids*.
 4. Pagtuman sa mga regulasyon sa *quarantine* sama sa paglikay sa pagdala ug mga saha sa ubang lugar aron pagsumpo sa pagkaylap sa sakit.
- C. Siguraduhon nga ang yuta nagbaton ug insaktong nutrihina o abuno.

PANAMA DISEASE (FUSARIUM WILT)

PASIUNA

Ang *Panama* o *Fusarium wilt* usa ka sakit sa saging nga kasagarang makaapekto sa sistemang *vascular* sa saging.

Ang hinungdan niining sakit mao ang *fungus* o amag o agop-op nga anaa sa yuta. Mobara kini sa agianan sa tubig sa saging hinungdan nga malawos ang mga dahon niini. Ang pagkontrolar sa maong sakit pinaagi sa paggamit ug pamatay-dangan dili epektibo.



Ang yuta usab nga natamnan na og saging nga anaa na niining sakita, dili na mahimong tamnan sa saging sa sulod sa 10 ka tuig, ilabi na gayud sa saging nga Latundan, Señorita ug Cavendish. Ang Sab-a o Cardaba kasagaran makasugakod ra niining sakita.

PAGKAYLAP

Ang *fungus* mosulod pinaagi sa gamut sa saging ug modagan ngadto sa *xylem* (agi-anan sa tubig) ug dinhi motubo ug modaghan. Ang pagka-anod sa semilya sa *fungus* (*spores*) ngadto sa ibabaw nga bahin sa tanom makapadali sa pag-atake sa sakit sa tibuok nga bahin sa tanom.

TIMAILHAN

- Ang unang timailhan mao ang pagdalag ug pagkalawos sa gulang nga dahon.
- Ang linghod o bag-ong dahon magsunod-sunod ug pakita ug susama nga timailhan ug mohinay-hinay pagdalag ug pagkalaya.
- Ang punuan usahay maluko ug magpabiling magbarog sulod sa pipila ka semana hangtod nga kini malata.

- D. Ang punuan adunay liki ug ang pinutlan nga punuan magpakita ug kolor kape ngadto sa lagumon nga pula diha sa unod ug adunay pulahon nga buhok sa tibuok punuan ug bulig apan walay timailhan nga makita sa bunga.



PAGSUMPO

- A. Gamit sa *resistant variety* sa saging.
- B. Gamit sa tanum o parte sa tanum nga walay sakit o *tissue cultured banana plantlets*.
- C. Limpiyohan ang mga kagamitan aron malikayan ang pagkaylap sa sakit.
- D. Kuhaa o pinoha ang tanang tanum nga masakiton ug dili masakiton sulod sa 5 ka metro nga gilapdon ug butangi ang yuta ug solusyon sa *formaldehyde* o ipabilin nga mabakante ang yuta sulod sa usa ka tuig.
- E. Likaye ang pagdaro sa yuta aron malikayan ang pagdaghan sa sakit.
- F. Siguraduhon nga ang yuta nagbaton ug insaktong nutrihina o abuno.

Tinubdan sa Impormasyon:

High Value Crops Development Program
Department of Agriculture—Caraga

Technical Adviser:

Cherryl B. Virtudazo

Agriculturist II
Field Operations Division

Francis Louie E. Parina

Agriculturist II
Field Operations Division



“A food-secure and resilient Philippines with empowered and prosperous farmers and fisherfolk”

Gihimo ug Giapud-apud sa:



DEPARTMENT OF AGRICULTURE - CARAGA REGION

Regional Agriculture and Fishery Information Section

Capitol Site, Butuan City


Inabagan sa:

High Value Crops Development Program

Caraga Region

 www.facebook.com/darfo13

 da13caragainfo@gmail.com

 (085) 305-0092

 (085) 341-2114